



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa

18/6/2013

Parlamentu Aprova Projetu Deliberasaun Nú. 9/III Kriasaun Grupu Amidaze Parlamentár

Iha 17 Juñu 2013, plenáriu Parlamentu Nasionál aprova Projetu Deliberasaun Nú. 9/III kona-ba Kriasaun Grupu Amizade Parlamentár Timor-Leste ho nasaun 9 ne'ebé kobre Mozambique, Australia, Brazil, Cuba, Indonézia, Japaun, Portugal, São Tome Prinsipe no Afrika do Sul. Projetu Deliberasaun ne'e aprova ho votus afavor 33, kontra 0 no abstensaun 1.

Prezidente Interinu Parlamentu Nasionál Adriano do Nascimento iha nia intervesaun haktuir katak nasaun 9 ne'e mak sei sai alvu parseiru ba terseiru assembleia parlamentár Timor-Leste atu reforsa liu tan ita nia relasaun, iha asuntu interkambiu, fahe informasaun no koñesimentu, no hala'o diálogu parlamentár hodi reforsa demokrasia.

Deputadu Aniceto Guterres nu'udar proponente ba projetu deliberasaun ne'e esplika katak, tinan ne'e parlamentu limita número grupu amizade parlamentár ba sia de'it tanba esperiênsia iha segunda Assembleia Parlamentár Timor-Leste uluk la funsiona ho dí'ak. Situasaun ne'e akontese tanba limitasaun rekursu umanu no orsamentu.

“JSMP apresia esforsu hotu-hotu ne'ebé parlamentu halo ona atu promove relasaun parlamentár ho nasaun sira seluk, maibé JSMP enkoraza Parlamentu Nasionál atu indentifika parlamentu iha rejiaun sira ne'ebé asesivel no iha similaridade ho ita nia sistema Parlamentár atu nune'e ita nia deputadu sira bele hetan no aprende tan buat foun ruma ne'ebé relevante hodi haforsa ita nia sistema demokrasia”, dehan Diretór Ezekutivu JSMP, Luis de Oliveira Sampaio.

Partisipa iha aprovasaun Projetu Deliberasaun ne'e, Sekretariu Estadu Asuntu Parlamentar Teregina Viegas, membru parlamentu sira, representante sociedade sivil nomos média sira.

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl